

四庫全書

史部

欽定四庫全書

平定準噶爾方略續編卷三十一

乾隆三十年六月丙午

以增派兵丁互相推諉

飭諭伊犁將軍明瑞等

上諭軍機大臣曰阿桂奏稱前因明瑞所領之兵恐不敷用隨經札商據咨賊勢雖漸窮蹙但殲滅之期難以預定似宜增兵二千名至此事既經陳奏

應候諭旨於途次就近辦理臣以烏什現在情形  
尙未深悉所有增派兵丁果能尅期前往與否亦  
難懸擬請遵旨仍候明瑞酌辦等語明瑞阿桂移  
文往復未免互相推諉在他人且不可況伊二人  
為朕所簡用者乎即如進勦烏什一事近經明瑞  
等奏捉生訊問俱稱賊人口糧將絕自可計日克  
城且攻城非策惟堵截逃竄之路最為緊要何必  
增調兵丁若專為圍城起見則不但二千人雖有

萬衆尙恐不足況鄂津已領兵五百前往亦可協助明瑞身在烏什確按情形自當以不必增兵咨覆乃因此奏出於阿桂即令其自行辦理阿桂又不敢固執已見惟以情形未悉為言似此推諉游移將來恐有貽誤明瑞阿桂俱著傳旨申飭增兵一事即著停止

丁未

諭允伊犁將軍明瑞增調官兵仍與阿桂和衷集事

上諭軍機大臣曰據明瑞奏准阿桂咨已令愛隆阿由伊犁派兵二千遣赴烏什亦不必定拘原數等語昨以明瑞阿桂於增兵一事互相推諉因傳諭申飭但明瑞業經行文愛隆阿應已辦理陸續起程若又行撤回徒滋紛擾著照明瑞所奏行但明瑞奏內似以派兵一事專出阿桂之意蓋因阿桂年長又係朕特遣故相推讓阿桂不必疑為諂卸又明瑞謂身離伊犁數月未悉彼處情形應交愛

隆阿酌量辦理語亦非是明瑞酌量調兵愛隆阿  
不過聽候委辦豈敢專主且明瑞離伊犁未久彼  
處情形安得諉為不知此皆明瑞未經諳練所致  
阿桂閱歷有年前至軍營明瑞務與和衷集事不  
可稍存彼此之見

諭伊犁將軍明瑞嚴辦逆回及敘卹官兵回人等

上諭軍機大臣曰明瑞奏稱自五月初七日至十二  
日屢次擊殺賊衆收取牲隻無算等語逆回等時

出拒敵情罪重大卽力竭出降亦難寬宥至此數  
次奮勉進剿及陣亡得傷官兵回人等俱著查明  
交部照例議敘議卹再額敏和卓之子素賚瑞木  
薩鄂對之子鄂斯瑞布魯特散秩大臣阿奇木俱  
著有勞績並酌賞緞疋以示鼓勵此內有應行交  
部議敘者仍照例具奏伊等所屬之回人布魯特  
等有似此實心出力者俱著查明奏聞

庚戌

諭烏魯木齊提督五福酌停派赴烏什兵丁

上諭軍機大臣曰阿桂奏稱烏什增兵一事已行文烏魯木齊提督五福等將該處綠旗兵一千名辦理起程一面於伊犁兵丁內揀派千餘名陸續前來等語昨據阿桂奏請增兵朕即謂賊衆將屆絕糧烏什計日可克毋庸增派兵丁續慮愛隆阿已經辦理故仍准調撥今愛隆阿又調烏魯木齊兵一千名亦屬多事蓋賊衆逃竄所當預防而綠旗



兵多係步行豈能追及逆回截擒其衆明瑞阿桂  
舉動未免張皇恐各城回人聞之妄生疑忌著傳  
諭五福若烏魯木齊兵丁尙未起程即行停止或  
遄行未遠亦可撤回惟將抵烏什即留軍營協助

乙卯

諭伊犁將軍明瑞等停止調派伊犁綠旗兵

上諭軍機大臣曰愛隆阿等奏稱准明瑞行文已調  
鄂津領兵前往烏什又將熱河及涼州莊浪兵丁

揀選五百名起程續准明瑞阿桂增兵二千擬將  
伊犁滿洲察哈爾厄魯特兵派出五百名又行文  
烏魯木齊將預備綠旗兵一千帶領前往烏什等  
語明瑞前於伊犁調兵五百名此次又增調五百  
已足敷用何必又派綠旗兵伊等所辦太覺張皇  
著傳旨申飭所調綠旗兵一千名仍著停止

丁巳

伊犁將軍明瑞等疏奏捉生訊問及收賊牲畜

情形

明瑞等奏言五月十七日夜臣等派出埋伏兵  
丁擒賊十四人據供舊日在城居住者尙有口  
糧其各莊收入之四千餘戶被殺傷及病死者  
共二千餘人所存者大半無食惟尙能出戰之  
人賴黑木圖拉另以糧石分給臣等詰以城內  
窮蹙如此爾等何不出降據供因伯克等謂所  
犯罪重雖降亦死妻奴亦必被伯克所殺且不

知自身得免與否是以苟延旦夕又

盛京左翼鑲黃旗前鋒靈保前因派出哨探忽與  
同行入言欲入城諭賊使降遂馳馬向城為賊  
擁入續經捉生訊問云靈保見賴黑木圖拉諭  
令投降詞氣嚴正賊人恐其搖動衆心遂行殺  
害十八日賊人時來侵我卡倫臣等欲誘至平  
地以便勦殺十九日有馬上賊人兩隊前來我  
兵接戰即退賊亦不追轉下馬排立陸續添兵

良久有步下賊人五百餘驅牛羊千餘在兩河之間牧放并刈取枯草至日西時即收集回城臣等隨傳齊侍衛官員定計直衝賊陣收其牲隻遂東西分兵兩隊乘夜埋伏又令素賚瑯木薩等領精兵一隊攜帶信礮埋伏二十日城內馬步賊人仍帶牲隻牧放如前日西時臣等聞礮聲即領兵策應見三隊伏兵一齊衝擊賊人棄其牲隻敗走追至城東門聞門內鼓聲有大

隊陸續出援臣等施放大礮賊皆藏於溝渠城門亦閉始行撤回此次殺賊六十餘名生擒二十餘名獲牛六百三十餘隻連鞍馬十餘匹軍器無算兩日以來城下排列賊人雖較前加多並無牧放牲畜及割草之事而觀音保等報稱連日派兵擊賊亦有斬獲奏入

上諭軍機大臣曰據明瑞等奏捉生訊問情形及連日勦賊收取牲畜看來賊衆矢死抗拒殊為可恨

若不嚴誅何以示警明瑞阿桂斷不可仍存招撫之意此次官兵等尙屬奮勉著查明交部議敘有應賞巴圖魯號者查明請旨

命獎賞吐魯番郡王額敏和卓

上諭軍機大臣曰烏什滋事以來素賚瑞木薩俱著有勞績今日明瑞奏現在與賊相持素賚瑞木薩領援兵橫衝賊陣追至險阻之地大敗賊人等語素賚瑞木薩俱額敏和卓之子能遵父訓實心奮

勉已加恩賞給緞疋茲特賞額敏和卓大小荷包  
仍著傳旨嘉獎以示鼓勵

以副都統明普辦理多倫回人乖謬

申諭伊犁將軍明瑞等查辦

上諭軍機大臣曰明普奏稱多倫逆回阿璠案內干  
連之薩爾達克愛子木毀壞刑具脫逃隨行知各  
處緝拏等語近據額敏和卓明普等將逆回阿璠  
案內干連之和碩爾阿納爾薩爾達克愛子木等



分別定罪朕諭以伊等雖未曾首告尚無附和情  
形著加恩寬免並曉示回人知之明普一接此旨  
即宜將伊等省釋或候阿桂等覆訊亦應以寬免  
之旨先行曉諭仍照舊監禁則薩爾達克等斷無  
逃走之理乃並不曉示明白致將特恩寬免之人  
反陷脫逃之罪辦理甚屬乖謬昨因明普審訊此  
案將額敏和卓所言隱匿但以己意具奏業交明  
瑞等查該看來明普不能辦事除派員更換外將

現在情節亦交明瑞阿桂額敏和卓查辦脫逃之  
薩爾達克愛子木嚴加查拏務獲治罪

壬戌

諭伊犁將軍明瑞等拏獲逃犯愛子木正法示衆

上諭軍機大臣曰明普奏稱拏獲逃犯愛子木請解

京照例給賞為奴其疎防兵丁免死草糧枷責等

語愛子木係逆回阿璠案内人犯前經明普分別  
議罪朕以其本不知情特恩寬宥今乃起意潛逃

自當治罪而明普仍請解京備賞殊屬非是此事  
已諭明瑞等辦理可再傳諭伊等俟烏什事竣後  
傳集回衆宣朕諭旨以愛子木業蒙恩宥即駐劄  
大臣定罪亦不過發遣伊犁彼若安分靜候或可  
邀免乃乘間潛逃自取咎戾天朝法度無心獲罪  
猶可從寬若明知故犯斷無姑息之理即將愛子  
木正法將來孥獲薩阿達克時亦照此辦理其疎  
防兵丁等著照明普所奏辦理

伊犁將軍明瑞等疏奏納世通卞塔海俱遵

旨正法

明瑞等奏言欽奉

諭旨以納世通卞塔海俱係債事之人應於軍前正

法以觀音保代領其衆仍候阿桂到時辦理今

五月二十五日臣阿桂行抵軍營臣即將前奉

諭旨傳示納世通卞塔海等隨派員監看即行正法

奏入報

聞

甲子

伊犁將軍明瑞等疏奏逆回賴黑木圖拉身死  
信息

明瑞等奏言烏什賊衆因牧放牲隻被收屢日  
不敢出戰五月二十四日有馬步賊人五百餘  
來爭水草我卡倫兵抵禦良久臣等派兵策應  
斬獲賊人二十五日臣阿桂前至軍營會商暗

藏大礮將城下排列之賊擊退其城西亦有割  
草之賊連日亦俱有斬獲二十七日有馬步賊  
人二千餘出戰旋即敗退我兵追至城下向伯  
克等所居高屋施放大礮除陣斬賊人外捉生  
訊問賴黑木圖拉昨傳令劫營次一死戰不期  
為大兵擊敗又有回人二名帶馬三匹出降詢  
係伊犁塔里雅沁回人因大兵內有伊親屬是  
以來投令賴黑木圖拉已中箭透腰墜於北山

下身死係屬親見等語臣等雖未敢信以為實  
但恐賊衆乘亂潛逃隨徧傳東西二營併力圍  
截賊人仍出城下排立臣等以鎗礮急攻殺賊  
甚多復捉生訊問或稱賴黑木圖拉中箭身死  
或稱係烏鎗傷又聞衆伯克等推額色木圖拉  
為首仍訪取確信奏

聞奏入

上諭軍機大臣曰明瑞等奏稱賴黑木圖拉中箭殞

命賊衆仍另立伯克等語逆賊久抗大兵罪深惡極未得生擒寸磔已屬倖免而賊衆仍一心死守情罪可惡惟當遵節次諭旨盡行剿殺折毀其城不必多留官兵酌派能事員弁一二人領兵屯田聞該處所產硝磺甚多應廣為採取運解各城備用俱著於事竣後悉心商辦

命留副都統伊勒圖於伊犁辦事

上諭軍機大臣曰前諭伊勒圖往雅爾更換納蘇懇



令伊犁大員甚少著暫留辦事俟明瑞回日再行  
前往

諭伊犁將軍明瑞等將烏爾袞即於烏什正法示衆  
上諭軍機大臣曰明瑞阿桂奏稱查訊烏爾袞因向  
散秩大臣阿奇木索取衣裘不遂即行毆辱其餘  
所犯情事仍交綽克托審擬具奏等語烏爾袞仗  
納世通之勢任意毆詈伯克回人索取什物其事  
自不一而足即毆辱阿奇木一節屬實已應正法

雖再毆小伯克等百人其罪寧加於此明瑞等又飭詳查甚不曉事著將烏爾袞即提至烏什正法傳集衆伯克回人觀看

恩免德福應賠官糧并定布魯特等兵丁給糧之例上諭軍機大臣曰明瑞等奏稱原任布政使德福應請革職仍遵旨賠補濫給官糧其發往何處自備資斧効力贖罪請旨遵行等語德福同卞塔海在阿克蘇辦事卞塔海妄自尊大德福未能規正每

相附和又將無關緊要事件由六百里馳奏卞塔海既以失機正法德福亦應治罪因諭明瑞等定擬具奏但其獲罪情由尚不至如卞塔海之甚德福著革職發往伊犁効力贖罪所給布魯特行糧免其賠補再官給布魯特回人行糧一事前因納世通等辦事瑣屑折給回人等口糧必照內地兵丁扣算日期是以諭令此次姑准給發嗣後應行裁減原因伊等游牧甚近且遇事每多觀望不宜

一概濫給口糧近因烏什一事布魯特回人等在軍營者甚屬奮勉嗣後有調遣之處著加恩照內地兵丁給與行糧不必裁減

已已

申諭伊犁將軍明瑞等嚴辦烏什賊衆毋得遲疑

上諭軍機大臣曰明瑞等奏稱六月初二等日賊人與城西軍營拒敵伊等領兵夾攻復捉生訊問知城中另立伯克擬相機辦理速為竣事等語賊人

卷三十一  
怙惡猖獗如此伊等所奏似仍有招撫之意殊不可解若謂事期早竣則伊等駐守已數月未嘗催促及不惜兵丁責以梯衝克城之舉也特因回人頑梗若仍准其降則伊等謂罪不加衆轉視叛逆為常事拒守為良策且忽降忽叛亦與國體有關著傳諭明瑞等惟遵節次諭旨辦理克城之日即將伊等勦殺不必遲疑候旨

秋七月己卯

以攻勦烏什不力

飭諭伊犁將軍明瑞等

明瑞等奏言臣明瑞自六月初四初九等日勦賊後賊衆惟伏守城下並不收放牲畜臣恐其潛逃於十一日四鼓派兵二百伏於城西林內又派兵二百伏於城北塹下為援十二日有賊百餘騎出牧與城西伏兵相遇城北伏兵合力衝擊賊不敢入城城內又有賊千餘人突出拒

戰復為我援兵擊敗共斃賊百餘名生擒十七  
名得鞍馬器械無算驅其城下所牧牲畜全數  
歸營具東門水磨及所積糧食悉投水中訊問  
生口云額色木圖拉曾查核人數已損三分之  
一臣阿桂所得生口俱言城內口食將盡且不  
能牧養牲畜俟所調兵丁到日即當圍城奏入  
上諭軍機大臣曰明瑞奏派兵設伏斃賊衆毀棄  
糧食阿桂亦稱賊食將盡俟調兵一至即可攻圍

等語看來伊等意見尚謂逆賊等以死據守克復甚難雖窮蹙至此猶必待其自斃是從前之未曾力戰可知即如所奏賊人尚在城外設立水磨儲積糧石則伊等前此並未近城或較納世通卞塔海駐劄之地為稍近耳又如明瑞在城東駐劄今至西北埋伏亦屬可疑西北一帶係阿桂觀音保駐劄何以未聞會合策應昨據明瑞奏稱將擒獲生口幼弱無用者發遣入城以分其口食且使之



內潰是尚欲招降不知何意又欲於城之四周掘成深塹益屬錯謬烏什四面皆山若盡行鑿鑿當於何時可竣伊等辦理竭蹶即此可見明瑞阿桂著嚴加申飭再明瑞等雖東西分營駐劄仍須一體籌辦烏什並非大城東西相隔必不甚遠焉可仍蹈覆轍各存畛域將來功過過伊二人同之務遵朕節次諭旨一心協力不可稍有推諉之見

命賞護軍校雅爾呼達等巴圖魯號授為藍翎侍衛

上諭軍機大臣曰前因官兵等行走奮勉諭令酌量  
獎賞并擇其率先出力者予以巴圖魯號今據明  
瑞奏稱護軍校雅爾呼達委署驍騎校岱斌徹効  
力居多等語雅爾呼達著賜號巴圖魯岱斌  
徹著賜號貝克巴圖魯各賞銀一百兩仍加恩授  
為藍翎侍衛

壬午

命查訊賊人婦女持械拒敵者一併正法

上諭軍機大臣曰據阿桂奏烏什賊衆抗拒時有擒獲婦女等語賊衆以死拒守自應勦殺其婦女幼童曾命送往伊犁今伊等勢甚窮蹙猶然怙惡不悛並婦女亦敢行抗拒殊可痛恨著傳諭明瑞阿桂克復烏什後查訊賊人婦女內有曾經持械拒敵者一併正法毋得稍事姑息

命議敘護出步兵之侍衛訥蘇等

上諭軍機大臣曰明瑞奏稱從前卞塔海等進勦烏

什時賊人出拒即棄步兵敗走因乾清門侍衛訥蘇玉麟大門侍衛喀蘭泰卞倫侍衛伊什等殿後護出步兵一半等語訥蘇等著加恩交部議敘

伊犁將軍明瑞等疏奏會勦賊衆情形

明瑞等奏言臣等於六月二十四等日勦殺賊衆嗣後城下仍有馬步賊人伺我兵稍歇沿山牧馬我兵一動隨即逃走十六日臣阿桂觀音保來城東營盤議事十七日臣明瑞亦往城

西於歸途察看城垣由北山下行走為賊所覺  
在山巔以鎗礮相拒忽西門有賊二百餘騎來  
援城東兵與賊相持城西亦派兵策應賊敗走  
渡河復以大礮追擊賊逃入東門訊問所獲生  
口俱稱口糧將盡臣阿桂於十七日夜設伏十  
八日有賊數百騎出城為鄂斯瑞額森等擊敗  
伊什明亮永善等率兵截殺賊敗入西門臣等  
伏思賊衆既不敢出必夤夜潛行隨派兵於附

近有草處所埋伏天未明果有割草步賊捉生  
訊問據供城南山內有味諾克水泉稍足果食  
亦多有賊棲止又派兵搜勦是日已刻城北山  
上有賊騎遊牧巴圖魯侍衛沙爾瑚善衝入俱  
行勦殺計前後勦賊四十人捉生六十餘人奪  
牲隻器械無算奏入報

聞

丙戌

內大臣尚書都統阿桂等疏奏調撥新到官兵事宜

阿桂等奏言臣與明瑞商調伊犁官兵一千名已抵阿克蘇臣等公譏賊力漸弱今又增兵必益加惶懼官兵一到即令在烏什五十里外之阿禪塔克就水草合隊六月十六日陸續齊集十七日夜移至哈喇巴克查城西營盤馬兵尚少擬城東酌留一百名其九百名於十八日夜

調往城西尚有續調綠旗兵一千名月內可到  
俟全至軍營再行相機辦理奏入報

聞

己丑

伊犁將軍明瑞等疏奏攻圍烏什奪取南山情  
形

明瑞等奏言臣與阿桂會商移營近城合兵勦  
賊六月二十三日黎明先派公木薩等領兵攻



奪南山臣等督兵續進城西官兵亦鼓勇登山  
而兵既合賊衆不敢出拒惟於城垣塚口架礮  
施放步賊百餘人隱身放鎗我兵將賊磨房及  
念經處所焚燒一面舉礮向城攻擊臣等捉生  
訊問俱云額色木圖拉自為伯克時將伊子所  
積糧石分給黨惡之人屢欲悉衆拒敵因其下  
畏懼而止將來食盡計窮斷難固守奏入報

聞

壬辰

議伊犁挈眷官兵營制事宜

明瑞等奏言查熱河涼州莊浪三處官兵挈眷  
駐防伊犁所有滿洲蒙古馬步兵丁原屬因地  
制宜不能盡一現在送到熱河滿洲蒙古兵一  
千名係每百名為一佐領共十佐領此內八旗  
滿洲為八佐領六旗蒙古添湊兵二百名為兩  
佐領此十佐領之兵分為左右翼以協領二員

統之每員分管五佐領涼州莊浪又復不同令  
移往伊犁同駐一城若仍分為三處則各旗多  
寡不均一切差操派委及補用之員俱難計算  
臣愚請將三處官兵總合為八旗蒙古兵亦照  
健銳營之例合於滿洲旗分一體揀選其檔案  
仍行分記計三處所來協領恰有八員各管一  
旗現在三十八佐領共兵丁四千二百四十六  
名應請添設兩佐領其增添兵數於礮手匠役

及養育兵缺內通融調撥總計滿洲蒙古八旗  
領催一百六十名前鋒三百二十名馬兵二千  
八百名步兵六百名礮手四十名匠役八十名  
養育兵二百四十名以符四千二百四十之數  
俟三隊官兵全到時再行均辦應行鑄給關防  
圖記亦請照數辦理奏入得

旨軍機大臣議奏尋議駐防伊犁官兵既屬同城自  
應將各該處原定額數均派整齊庶管束稽查

與行走操演俱昭畫一且以各兵額設錢糧酌  
量裁汰撥補亦並無煩費其應行裁汰添設官  
員及礮手匠役人等量行裁留以便通融俸餉  
并照所定額數給與關防圖記之處俱如所奏  
辦理謹將官員兵丁糧餉各數一併列單恭呈

御覽奏入

上從之

乙未

命將原任總兵和誠即於和闐正法

上諭軍機大臣曰據額爾景額奏稱原任總兵和誠重利盤剝回人及折收金兩之處俱經審訊明確請將和誠解交明瑞再行覆訊擬罪等語和誠係特簡和闐辦事大員似此貪婪敗檢大干法紀實出情理之外可傳諭明瑞等將和誠即在該處正法示衆仍傳諭回人等知之

申諭伊犁將軍明瑞等嚴辦烏什賊人及查奏官兵

功次

上諭軍機大臣曰據明瑞等奏稱六月二十九日兩營合勢進逼賊城等語是伊等從前距賊巢尚遠今始進薄其城耳官兵屢次進剿賊衆惟以死相拒非痛加懲創不可著傳諭明瑞等將所獲生口俱即正法得城之日遵朕節次所降諭旨辦理我兵既直逼城下而五福之兵亦到不為不多務宜晝夜巡防俾賊衆不得休息絕其芻牧斷其樵採

並於隘口嚴行偵候斷不可使一賊竄逸此次烏  
什賊衆雖屬小醜而兇狡實甚官兵及厄魯特布  
魯特等不避矢石有進無退甚屬可嘉即前此平  
定準噶爾及回部時似此格鬪之事亦少著明瑞  
等於事竣後將奮勉効力勞績出衆者查明分別  
奏聞候朕加恩優敘至明瑞身為將軍辦理無策  
以致曠日持久免咎足矣何可言功併傳諭知之

戊戌



飭諭副都統職銜栢琨辦理霍罕文移之謬

上諭軍機大臣曰據栢琨奏稱遣往霍罕偵探之回人多里野特墨特帶有額爾德尼伯克書信隨送交明瑞明瑞查驗封套係回覆喀什噶爾葉爾羗大臣之書因不知情節仍行發回今將來書譯出大概係辨明阿卜都喇伊木通信一事謂大臣等忽聽小人之言看來無甚關係似無庸置議等語所見甚屬錯謬額爾德尼並未呈書將軍栢琨並

不細加譯看即送交明瑞已覺草率若因係納世  
通從前所辦不欲接管更屬推諉伊即不知情節  
豈無舊案可查且原書既經明瑞發回伊重加譯  
看有大臣等勿信小人之語自當將此事顛末一  
一指出方足見國家用法之當毫無偏聽於其間  
使之心服乃竟謂無甚關係含糊了事豈駕馭外  
藩之道且大臣等彼此更替將來後任者俱可將  
前事置之不問其貽誤尤不淺栢琨著嚴加申飭

如霍罕尚未有來使即著永貴行文額爾德尼明  
白曉示明瑞雖非承辦此案之人但從前情節俱  
經知會此時又經譯出乃僅以發回結局亦屬非  
是並著傳諭知之

辛丑

伊犁將軍明瑞等疏奏賊衆投降情形

明瑞等奏言七月初二日臣等會合官兵奪據  
南山雖有賊人抵禦但隱藏施放鳥鎗官兵追

賊直至城下毀其塚口數處殺賊二十九人賊  
衆內有喀喇和卓托克三吐魯番村莊頭目夜  
間呈送稟帖開載投降人名並求免死臣等諭  
云爾等於大兵初到時何不歸附此時不過希  
冀免死不便准降令其回城伊等又稟欲邀結  
二三百人為內應又懇求公木薩素齊瑞等告  
以若擒額色木圖拉等首惡來獻或可代乞施  
恩等語續有回人十四名來投告稱從前稟請

來降人等為額色木圖拉所覺將為首四人俱已殺害其餘潰散我等乘間逃出等語連日捉生訊問俱稱實有其事臣等伏思賊人已將內潰此十餘名回人若即行正法愈堅賊人死守之心應暫時留於軍營相機辦理奏入

上諭軍機大臣曰明瑞阿桂奏本月初二初四等日攻敗賊人直抵城下等語看來伊等從前並未近城不過較納世通等稍覺不遠耳至現在賊衆情

形已覺困憊不支計接奉此旨時應早竣事矣逆賊等一心死守至於數月甚屬可惡今力窮求免斷不可允首惡額色木圖拉尤寸磔不足以蔽辜者即其屬人縛伊以降亦不可姑息仍當督兵進剿著明瑞阿桂遵照辦理

壬寅

命解送賊人家口毋得官給行糧

上諭軍機大臣曰官兵等進剿烏什逆回攻圍既經

數月賊衆無以為食自應旦夕就誅但窮蹙至此仍以死抗拒實屬兇狡斷不可姑息容留前諭將丁男俱行勦殺其十三歲以下幼童及婦女送往伊犁發往時俱令自備資斧不得給以口糧蓋伊等恃糧食有餘相率抗拒戕我大臣官兵而伊等家口窮迫之時轉給以養贍有是理乎著明瑞等於事竣後查明此等賊人家口若隨身尚有口糧能前往伊犁者姑貸其一死或不能自給沿途餓

斃伊等獲全首領尚屬厚倖斷不可過行小惠給  
與口糧以致濫費公項



平定準噶爾方略續編卷三十一

欽定四庫全書

平定準噶爾方略續編卷三十二

乾隆三十年八月戊申

陝甘總督楊應琚疏奏招募烏魯木齊屯田戶  
口數目

楊應琚奏言上年八月間欽奉

恩旨令將甘省與新疆接壤居民量其道路近便遷  
移烏魯木齊俾資生有藉曠土愈開臣查烏魯

木齊泉甘土沃素為邊氓所慕隨於肅州張掖  
敦煌等州縣招有七八百戶上年十月奏明辦  
送茲據肅州申稱招民八百餘戶高臺縣招民  
四百餘戶臣一面行文辦理糧務道員在瑚圖  
畢寧邊城昌吉羅克倫等處查明餘地暨渠水  
情形可以安插照例給與車輛口食派員於八  
月內管送前往其來歲應招戶民仍俟查明安  
插處所照例辦理奏入報

聞

已酉

諭駐劄和闐總兵官巴延弼潔已和衷毋擾回衆

上諭軍機大臣曰巴延弼已授為宣化鎮總兵官命  
往和闐辦事伊得旨後若來京請訓往返有需時  
日著即由彼馳驛前往和闐因思駐劄大臣等多  
官於內地習尚安逸既以邊隅為勞苦又或不能  
同寅協恭或不能潔已自愛苛擾其下滿洲世僕

豈宜出此即如素誠在烏什貪淫敗檢竟致激成  
叛亂已身被害并子嗣俱無所逃罪和誠在和闐  
隱匿應貢之玉又重利盤剝回人亦經治罪正法  
其明鑿也大臣等果能正己率屬與同官和衷集  
事將來年滿撤回必加恩擢用著傳諭巴延弼朕  
因其人尚可用予以奮勉之階伊至和闐當以素  
誠和誠為戒再和闐采玉係常年土貢每派出回  
人供役伊等倘怠玩隱匿自當加意約束若効力

行走尚屬勤謹則應酌量賞給以示鼓勵不可絲毫擾累

庚戌

飭諭伊犁將軍明瑞等不早圍困賊人並誠毋姑息  
納降

上諭軍機大臣曰明瑞阿桂等奏稱賊勢較前衰弱  
伊等於七月初九日領兵逼近城根掘溝築牆防  
其迸逸東門突出賊衆二千為官兵擊敗入城

仍不時衝突城西亦然現在各門俱築長圍俟疊  
砌堅固自無所逃等語看來我兵從前離城甚遠  
且掘溝築牆一事何以早未計及若謂兵不敷用  
明瑞身為將軍即應據實陳奏再伊等奏內有賊  
人欲割城下未熟之黍為我兵擊敗之語烏什賊  
人滋事始於二月計其耕種之期不過三四月間  
何以未聞驅逐毀棄若似此圍困賊人雖經年看  
守亦不能竣事明瑞等著嚴加申飭至伊等既以

長圍困賊無路可逃若仍准納降則姑息過甚斷不可行明瑞等務遵節次所降諭旨辦理

己未

命議叙奮勉勦賊官兵

上諭軍機大臣曰明瑞等奏稱七月十八日至二十四日賊人屢次出城衝突俱經擊敗等語賊勢窮蹙至此尚敢行抗拒情罪可惡即明瑞等亦知其不可招降矣至官兵等遇以死拒守之賊人能奮



勇攻擊甚屬可嘉前已諭明瑞等查明分別奏聞  
著將此次查奏之出力官兵交部議敘嗣後官兵  
內有奮勉出衆効力者俱著詳悉存記俟事竣奏  
請加恩優叙

諭伊犁將軍明瑞等查辦和闐滋事回人

上諭軍機大臣曰明瑞等奏准額爾景額咨稱阿什  
默特所屬回人呢雅斯克伊葉斯常唆聳阿什默  
特苛虐屬人不可留於和闐臣以呢雅斯等如何

唆聳阿什默特之處並未確實證據遽行遣往  
伊犁恐阿什默特不無疑懼若訪聞屬實則阿什  
默特亦不可留於和闐行令查明定奪等語所見  
甚是但此案應行質訊之人明瑞應調集該處查  
辦不當仍委之額爾景額若此時尚未辦結仍著  
明瑞咨調辦理至回部伯克等如果擾累屬人縱  
加以寬宥亦難弭其疑懼之心著傳諭明瑞阿桂  
等查明此案情節若係呢雅斯克伊葉斯倚勢橫

行阿什默特失於覺察則呢雅斯等治罪後阿什默特亦不可仍留該處酌量與別城阿奇木伯克等對調若阿什默特因聽呢雅斯等之言自行苛虐回人即將呢雅斯克伊葉斯辦理阿什默特送京安插亦可

丙寅

諭伊犁將軍明瑞等議叙勦賊官兵及預籌駐兵事

宜

上諭軍機大臣曰明瑞等奏七月二十八日派巴圖魯兵六百三十餘名分為兩隊取城調伊犁遣犯十二人攜雲梯前列攻東北隅之兵乘賊未覺鼓勇先登奪據城垣有騎賊來援俱不能上惟在近城房屋拒守攻西南隅之兵因賊已知覺防守未能登城近城之賊又放鎗拒戰恐官兵有失始行撤回此次登城勦賊奮勉可嘉惜西南隅登城稍緩否則竟可克城竣事矣計賊人心膽已寒必至

內潰著傳諭明瑞阿桂等將此次効力出衆得傷陣亡之人俱查明具奏候加恩敘卹其發往伊犁人犯果有出衆効力者亦應加恩或可即令充補綠旗兵丁著一併查奏至另摺所奏官兵不便與回人雜處如沙雅爾等城未嘗駐兵頗屬安靜而烏什有兵轉致滋事不若將各城官兵調集駐劄一處庶兵力不分而擾累回人之弊可杜等語所見非是烏什有事特由素誠激變卞塔海又辦理

不善以至如此豈可謂回人無端滋事若因此謂  
回人俱不可信則烏什事起伊等當羣相附和何  
以絕無動靜朕前諭將該處城垣毀拆今可毋庸  
辦及或駐劄綠旗兵屯田或移阿克蘇大臣駐劄  
亦可至合兵駐劄一事即地方全定亦當於四五  
年後辦理倘倉遽行之回人等必以我有鑒於烏  
什而防閑太過不但徒起猜疑亦非所以彰國體  
所奏不可行俱著傳諭明瑞阿桂知之

丁卯

諭烏什各城更調駐劄事宜

上諭軍機大臣曰據明瑞阿桂等奏烏什平定後酌議駐兵一事朕已諭將該處城垣不必拆毀各城駐劄大臣當以烏什為總匯之地著永貴駐劄辦事其阿克蘇毋庸駐劄大臣官兵即移於烏什綽克托亦著協辦烏什事務兼轄阿克蘇喀什噶爾事雖不煩栢琨一員尚覺不足著與額敏和卓同

辦事務其各城大臣仍依舊制烏什等城俱聽伊犁將軍管轄隔一二年親往各城巡查一次至烏什地頗肥饒多駐綠旗兵似於屯田有益一切駐兵籌餉事宜著明瑞阿桂等會同詳議具奏

九月戊寅

伊犁將軍明瑞等疏奏克復烏什城

明瑞等奏言八月初九日五鼓烏什城內有賊三四百人來衝西南隅長圍堞口本隊侍衛玉



麟領隊大臣觀音保侍衛訥蘓領索倫兵侍衛  
烏勒木濟巴顏布伊什等協力勦殺自此賊人  
固守不出臣等計斷賊人登瑚什塔克峰之路  
添築一臺兩堞以擊登山之賊十二日賊勢窘  
迫有賊十騎領步賊四百餘人直犯新築堞口  
公品級素賚瑞伯克薩里等迎敵瑚什塔克峰  
賊衆來援侍衛阿克棟阿伊達禮海祿副總管  
庫庫濟克護軍校穆克登布等領兵直出堞口

衝擊臣明瑞同侍衛保寧永泰佛倫泰前鋒薩  
炳阿整兵繼進臣永貴臣額敏和卓臣鄂寶以  
大礮橫擊據葉什屯山角堞口佐領碩通伯克  
阿三布魯特比伯爾克侍衛沙瑚善卡倫侍衛  
伊什等俱領兵合隊追至城門計此次殺賊百  
餘人生擒一人我兵得傷二人傷輕者七人陣  
亡厄魯特一名自築圍以來我兵中礮陣亡者  
一名得傷者三名又另片附奏云於十五日克

復烏什城其首逆額色木圖拉及有名賊衆俱已拏獲俟將各賊嚴行勦殺後再將辦理情形詳悉具奏奏入

上諭軍機大臣曰今日得明瑞等奏摺僅將八月初九等日與賊相持及為從前守塚陣亡得傷人等聲敘請卹並未將如何克復回城擒獲賊首情形具奏祇於奏片中渾含數語即得城後有急需辦理之事不及詳悉陳奏亦不應簡略至此著傳諭

明瑞阿桂等將入城擒賊情形逐一作速奏聞其  
城垣形勢及官兵所築長圍臺塼攻守大槩俱著  
繪圖呈覽又

諭曰明瑞等奏稱八月十五日克復烏什城等語烏  
什賊衆敢行叛逆據險死守久抗大兵甚屬可恨  
今罪人斯得著傳諭明瑞遵節次所降諭旨辦理  
此次烏什一事進勦半年僅能克復明瑞阿桂俱  
朕簡用之將軍大臣如此辦理遲滯幸免於罪足

矣豈當復予議敘其在事官兵俱各奮勉効力較從前平定伊犁回部時戰功猶覺過之著明瑞等將官兵內著有勞績及陣亡得傷者分別查明具奏交部議敘議卹其烏什駐劄大臣官兵之處俱遵前旨行

辛卯

伊犁將軍明瑞等疏奏辦理烏什逆賊情形

明瑞等奏言臣等領兵築堞圍城賊人屢次衝

突俱行勦殺城內薪芻俱斷惟拆屋取茅以支  
旦夕人口馬匹倒斃甚多賊衆各生怨恨而額  
色木圖拉仍嚴行脅衆凡欲出投降降者即行殺  
死或折其手足暫行監禁復將餘糧運至默勒  
徹爾山上據險苟延有原充烏什商伯克之沙  
布勒三次差人來告欲擒首惡以獻臣等並未  
允降八月十四夜有二人出城告知沙布勒錫  
喇卜阿琿等現在擒拏助逆各犯等語及天曉

沙布勒已先將助逆要犯四十二人獻出次將額色木圖拉及其子阿穆爾努拉塔塔伊勒等拏獲到營臣等即將首惡監禁一面遣人入城見各處尸骸甚多大小戶口尚存一萬有餘因關閉城門將舊伯克及賊人所用伯克姓名依次開列又將軍器收取傳集回人布魯特人等將額色木圖拉等首惡即行凌遲處死並將中箭身死之首惡賴黑木圖拉尸骸掘出剉磔此

外有名賊犯俱行正法錫喇卜阿琿等雖隨同擒賊但與賊同謀已久所有伊等兄弟子姪六百餘人又魯克察克人等有附和首惡分管回衆看守城垣者其十三歲以上男子四百餘人亦行正法額色木圖拉一戶婦女幼子派員解京其餘俱已分給現在軍營之官兵訖至沙布勒一犯當逆賊倡亂時因押送伊犁戶口並未在城迨聞信趨回欲與駐劄大臣共辦逆賊而



衆皆歸附賊首因托病不出今擒賊獻城將同  
謀肆惡各賊逐一指出尚與衆賊有間應作何  
辦理恭候

諭旨其餘被逆賊拘禁折斷手足之人及被殺人等  
之兄弟子姪又不食逆賊口糧各項匠作僕役  
窮苦之人以及分給官兵餘乘之婦女幼子大  
小共一萬餘口分為四起解送伊犁分別辦理

奏入

上諭軍機大臣曰明瑞阿桂等奏稱烏什賊衆擒獻首惡已分別正法及送往伊犁辦理等語昨據伊等奏報克復烏什語甚含糊距今十二日始以查辦賊衆具奏而所辦又極乖張錯謬即如賊人戕我大臣官兵以死拒守及長圍久迫始縛獻首惡希冀苟免誅戮準以天理人情豈復可赦惟盡以軍法從事始足申國憲而儆愚頑乃辦理半年不能速為擒勦仍待賊衆窮急自獻始稱竣事豈不

貽各回部布魯特人等姍笑且朕屢降諭旨特以此等回人逞兇肆惡若不大示懲創將來或効尤滋事轉非辟以止辟之道今伊等既從事姑息著將送往伊犁人等即交伊二人養贍再伊等從前請於烏什駐兵屯田朕已諭令籌議今另摺所奏忽將五福所領綠旗兵撤回何錯謬至於此極所有官兵來往資糧俱著伊二人償補且前諭得城後查核素誠阿卜都拉等一切情事原欲詳其顛

末傳諭中外而額色木圖拉既擒亦應訊取確供  
再正典刑乃一味草率完局不知伊等十數日來  
所辦何事由此觀之則所查正法之賊人亦皆聽  
信人言未能脗合情理此必明瑞顧念家室早欲  
回京而阿桂亦思早至伊犁更替明瑞阿桂著交  
部嚴加議處俟烏什事竣均即往伊犁候旨又

諭曰明瑞等奏烏魯木齊綠旗兵令五福帶領護送  
移解回人後再行撤回於八月二十一日起程等

語著傳諭五福伊所撤之兵若距烏魯木齊尚遠  
仍令回至烏什或相去已近自當暫為休息俟正  
月前往以不悞春耕為妥若謂此次派出官兵業  
經往返即另派亦可

以伊犁將軍明瑞等辦理烏什舛謬

宣諭中外

上諭大學士曰明瑞阿桂等辦理烏什回城一事已  
降旨交部嚴加議處但奏摺並未抄發恐衆人不

悉其中原委或疑回人既已平定何以不行議敘  
轉加議處今將伊等奏摺抄發俾衆共知其舛謬  
之處不一而足即如今春烏什逆回賴黑木圖拉  
等因素誠激變據城抗拒特命明瑞阿桂帶領官  
兵前往辦理伊等初至時朕因烏什蕞爾孤城又  
無外援易於收復官兵毋庸悉銳進攻輕撻鋒鏑  
是以令伊等惟嚴圍困之計使賊回勢窮力蹙則  
乘機攻勦尤為事半功倍今圍城已及半載逆回

芻糧乏絕馬斃人饑自生離叛此時攻取易若摧  
枯況既知賊衆內潰并聞城內倉皇救火聚集驚  
惶即當統率大兵悉力攻城誅殺賊衆以揚我武  
乃兵已臨城尚退列壘內及經回衆將要賊獻出  
始行入城復闢閉城門收獲鎗礮弓箭種種示怯  
全不知奮勇任事則回城之復定尚得謂由伊等  
收取耶我國家定鼎之初兵威丕振雲梯所向立  
破堅城從未有稍存畏葸退縮不前之事不謂伊

等於烏什彈丸之地選悞周章損我國威伊等罪實在此至素誠等苦累回人各情節雖從前得之俘囚之口今額色木圖拉等正犯既經就獲理應嚴訊起釁緣由及素誠所犯是否屬實使情罪確鑿以成信讞而衆共曉然方結此事之局乃伊等一槩置之不問輒將賊黨正法有是理乎明瑞阿桂此次辦理節節錯謬不得不交部議處以示懲創其在事將弁兵丁仍交部分別議敘朕辦理庶



務一秉大公賞罰悉期允當此天下臣民所共知而於軍令賞罰之際更所慎重茲將伊等原奏抄發俾衆共知自見其辦理之無紀緒也並宣諭中外知之

甲午

伊犁將軍明瑞等疏奏查詢阿卜都拉被害各情形

明瑞等奏言烏什阿奇木伯克阿卜都拉當賴

黑木圖拉聚衆之時已被監禁後為賊人所害  
逆賊賴黑木圖拉欲納其長女而伊妻嫉妬遂  
暗行逼害臣等伏思阿卜都拉雖無獻女賊人  
之事但縱容所屬激變回人罪無可逭今伊身  
已被害其所生三子二女現被逆賊監禁似可  
從寬交與撤回官兵帶往哈密奏入報

聞

辛丑

諭伊犁將軍明瑞烏什酌駐官兵事宜

上諭軍機大臣曰明瑞等奏稱烏什新定應酌量留  
兵五百名滿洲兵以副都統舒泰乾清門侍衛保  
寧管轄索倫兵以原任總管達克塔納管轄綠旗  
兵以乾清門侍衛法靈阿管轄並請於効力贖罪  
人員內留原任協領伊昌阿原任三等侍衛舒明  
阿管理工作留原任御史忠德管理糧餉其屯田  
事務調巴里坤遊擊陳堯典辦理等語烏什事竣

滿洲索倫兵無須多駐著留滿洲兵一百名索倫  
兵一百名前據明瑞等請派綠旗兵屯田已諭將  
五福所領兵丁留駐乃伊等忽令撤回業經降旨  
申飭著仍遵前旨量其行走之遠近若已抵烏魯  
木齊即於來年正月起程或另派亦可五福亦不  
必再往烏什仍留烏魯木齊著楊應琚於副將內  
揀選一員由烏魯木齊領兵前往烏什其管轄兵  
丁預備差遣各員俱照明瑞等所請行將此傳諭

知之

冬十月己酉

諭伊犁將軍明瑞等各城阿奇木伯克毋庸更調

上諭軍機大臣曰明瑞阿桂等奏稱葉爾羌喀什噶爾阿克蘇和闐之阿奇木伯克等多不滿物議此內惟鄂對人尚可用阿什默特亦能辦理事務至噶岱默特色梯巴勒氏聲名較前稍減除鄂對駐劄葉爾羌外請將噶岱默特調往阿克蘇色梯巴

勒氏調往和闐阿瓜斯伯凱補授喀什噶爾阿奇  
木伯克等語所見又屬錯謬鄂對等皆歸順舊人  
且遇有軍務頗能出力報効此次若盡行移調則  
回人布魯特等不知情事妄啓猜疑謂國家乘新  
取烏什之威將伊等更調若謂伊等貪圖小利亦  
回人常事安能保其必無惟在大臣等正已率屬  
賞罰嚴明地方自必安靜毋庸更調紛紜轉滋惶  
惑即如所奏伊等應行更調之處亦未有確實欸

蹟不過得之物議又可盡信乎況明瑞等從前尚欲盡撤各城大臣倘從所請則將來伯克等之賢否復以何人為之體察可謂自相刺謬矣所有更調阿竒木伯克之處俱不必行惟伊等另摺所奏善後事宜尚屬可行著交軍機大臣議奏

甲寅

議回部善後事宜

伊犁將軍明瑞等奏言臣等欽奉

諭旨會議回部事宜定為章程以昭法守謹將回部  
各城應行更正之處列款具奏一阿奇木之權  
宜分查各城舊制以阿奇木伯克總辦事務相  
沿既久體統益尊而大臣或不能兼聽並觀惟  
阿奇木是信伊等遂任用私人侵奪小伯克等  
承辦之事以致諸弊叢生請嗣後一切事件阿  
奇木伯克俱先交承辦之員俟其呈稟仍與伊  
沙噶伯克會商若有仍前攬權獨辦許伯克等



於該駐劄大臣前控告查訊得實卽治阿奇木之罪虛者反坐一格訥坦之私派宜革回人賦稅頗輕惟厄魯特時有格訥坦名色以備差務每年各城派四五千騰格不等俱係臨時酌派並無定額易滋擾累侵蝕諸弊今各部落使人已官給口糧羊隻大臣等俱有養廉自應將前項陋規禁止查照從前吐魯番定制豫擇富戶給與地畝令其輪值每戶一二年間輪辦一次

以裕回人生計一回人之差役宜均從前厄魯  
特時每年派哈喇罕一人和卓一人將各城回  
人戶口賦役造冊開除老弱衆所共知後來漸  
生隱匿賄脫之弊應請仍循舊規每間一年派  
委委員查核一次若有輕重不均一經首告訪  
聞即將該阿奇木等議處一都官伯克之補用  
宜公查該伯克總辦回人差務最易射利居奇  
且有阿奇木等之子弟親戚踞為利藪請嗣後

該伯克缺出必與伊沙噶噶雜納齊商伯克公  
同保舉其阿奇木等族姻俱令迴避一伯克等  
之親隨宜節伯克所用親隨謂之顏齊向有定  
額惟取中等人戶有陞調別城者但按品級稍  
為增益今則濫行挑派多至數倍且必派富戶  
其應納賦稅攤入他戶伯克等從中侵蝕而顏  
齊等又挾制伯克市權攬事擾累回人請將各  
該伯克之顏齊令阿奇木等公同查核如有額

外挑派槩行革除一賦役之定額宜明回人等  
每年應辦賦役俱由伯克指派並不預為曉示  
以致放富差貧種種擾累應請將現辦賦役定  
額令該大臣等以印文榜示俾衆共知如有不  
遵定額偏枯擾累准其控告虛者反坐一民人  
之居處宜別內地貿易商民將來漸多所居或  
與官兵相近尚可彈壓不令生事若聽其隨意  
棲止與回人相雜不免易滋事端請交該大臣

等徹底清查俱令赴駐兵處所貿易若仍與回人雜處即行治罪一伯克等與大臣官員相見之儀宜定自平定回部以來阿奇木以下伯克並無接見定例以致該大臣等有妄自尊大者請嗣後阿奇木伊沙噶伯克見大臣官員等照總管副總管例其餘伯克俱照官兵之例仍令大臣官員等不得稍形簡傲奏入得

旨軍機大臣議奏尋議阿奇木伯克自當秉公率屬

與伊沙噶噶雜納齊伯克等各司其職其都官  
伯克承辦一切差徭與小戶回人最近亦當公  
同保舉至伯克等親隨尤宜量行挑選嚴加約  
束不得派出富民致游手日增賦役暗絀又如  
除額外之陋規核本年之戶口示賦則以防求  
索之端定儀注以杜驕矜之漸俱係革弊安良  
之要務誠如

聖諭俱屬可行應請通行各城駐劄大臣遵照辦理

近奉

諭旨著伊犁將軍一二年內巡查回部一次應令該

將軍一體留心稽察奏入

上從之

諭將軍明瑞等即回伊犁辦事

上諭軍機大臣曰今烏什事竣已經兩月明瑞等即

應回伊犁辦事設謂尚有未完之件此等瑣屑事

務豈一時可了逐細搜尋轉屬無益且永貴額敏

和卓等亦可陸續辦理著傳諭明瑞阿桂與永貴  
交代後即行起程不必久留烏什

丙辰

命改鑄總理回城事務印信

上諭軍機大臣曰明瑞奏稱阿克蘓官兵俱移駐烏  
什所有舊頒印信應送部繳銷請另行鑄給等語  
著該部鑄給總理各回城事務參贊大臣印一顆  
兼清漢篆及回部字體頒給



戊辰

命敘卹克復烏什有功及陣亡得傷官兵

上諭軍機大臣曰明瑞等奏稱克復烏什官兵於閏

二月初六日及六月十八十九二十二二十九等日

七月二十八日歷次勦賊圍城著有勞績及陣亡

得傷之官兵回人等遵旨分別等次造冊送部請

加恩敘卹等語著加恩將有功陣亡得傷之官兵

回人等俱分別議敘議卹具奏

十一月庚寅

伊犁將軍明瑞等疏奏辦理烏什回人情形

明瑞等奏言臣等前奏將烏什回人送往伊犁  
續奉

諭旨將伊等送往內地賞給大臣官員等為奴臣等  
於十月二十一日會商並詢問分起帶領之大  
臣等俱稱此等回人沿途每欲逃竄屢經追獲  
又竊食官兵馬匹至伊等彼此搶奪鬪毆無時

安靜實屬怙惡不悛若離其妻子長途遠送必致滋生事端除病斃及正法匪犯共三百六十餘人外查明從前並未從賊致被監禁折足及棄其妻子出降者共九十一人應從寬貸其餘始終助惡回人二千三百五十餘名臣等帶領官兵於二十三日行至摩多地方俱經正法所有婦女俱配給無妻之索倫察哈爾厄魯特等兵丁其年老婦人童稚男女賞給各官兵為奴

臣等因此等回人未便送往內地是以酌量辦理奏入報

聞

臣等謹按西陲

大功告成回城久經綏輯開屯增市薄賦輕徭耕牧恬熙人安樂利烏什蕞爾彈丸自外生成敢作不靖特以駐守之臣拊循失律逆回賴黑木圖拉等脅衆櫻城抗顏負固

皇上炳照幾先灼知召變所由既正刑章載申軍律

調兵攻勦

親授機宜破其間諜之謀斷其樵蘓之路深溝高壘  
食盡力窮既而賊黨自攜縛渠來獻皆本

聖主乙夜疇咨信賞必罰是以逋誅六月拉朽一時

克復之機固踰

睿算且烏什壤雖褊小實處阿克蘓喀什噶爾之交  
憑瑚什塔克峯之險亦諸回城聲援聯絡奧

區也伏讀

御製戰圖補詠序文有云初以王師勦逆撫順不可  
無故奪之今值彼變亂自取屠滅因以為回部適  
中官軍都會之地是又開惑論所謂愈變而愈康  
者大哉

皇言向者準夷既定必經阿逆之餘燼就灰而衛喇  
永靖及回部既平亦經烏什之藁萌旋折而  
雜種胥寧蓋

天純佑我

國家所以因小變而益致久安其信如操券者若

此

皇上諭臣等以正編成於庚辰西師之凱旋續編成

於乙酉烏什之蕝事

豐庸所著

靈臚文臻為依古史書所未有臣等謹述善後事宜推

本

聖謨昭垂法守竊愧管牖之識末由尊揚萬一云





平定準噶爾方略續編卷三十二